





原件破损

宋之問集卷上

賦二首

五言古詩三十九首

七言古詩十六首

賦

秋蓮賦并

天授元年

城西入閣

請龜契

紅蕖論



則分直於洛
伏閣人奏

其長覩其盛惜其衰得終天年而無夭折者良以隔礙仙禁人莫由窺向若生於瀟湘洞庭溱洧淇澳即有吳姬越客鄭女衛童芳心未成採擷都盡今委以白露順以涼風榮落有期私分畢矣斐然願歌其事久之乃述秋蓮賦焉

若夫西城祕掖北禁仙流見白露之先降悲紅蕖之已秋昔之齒齒齊秀芳敷競發君門闕兮九重兵衛儼兮千列綠葦青枝緣溝覆池映連旗以採艷輝長劔兮陸離

疏瀍兮裂轂交流兮相沃四繞于丹禁三匝兮承明曉而望之若霓裳宛轉朝玉京夕而察之若霞標灼爍散赤城旣如秦女艷日兮鳳鳴又似洛妃拾翠兮鴻驚足使瑤草罷色芳樹無情複道兮詰曲離宮兮相屬飛閣兮周廬金鋪兮璧除君之駕兮旖旎蓮之葉兮扶踈萬乘顧兮駐綵騎六宮喜于停羅裾仰仙遊而德澤縱玄覽而神虛豈與夫溪澗兮沼沚自生兮自死海沂兮江沔萬里兮烟波泛漢女遊湘娥佩

鳴玉戲清渦中流欲渡兮木蘭接幽泉一曲兮採蓮歌江南兮峴北汀洲兮不極既有芳子莎城長無依兮水國豈知移植天泉香飄列仙嬌紫臺之月露含玉宇之風煙雜葩兮照燭衆彩兮相宣鳥翡翠兮丹青翰樹珊瑚兮林碧鮮夫其生也春風盡蕩爍日相煎天桃盡子穠李滅出大堤兮艷欲燃夫其謝也秋灰度管金氣騰天宮槐踈兮井桐變採寒波兮風颯然歸根息艷兮八九月乘化無窮兮千萬年越人望兮已長久鄭女採兮無由緣何深蒂之能固何穠香之獨全別有待制楊雄悲秋宋玉夏之來子翫早紅秋之暮兮悲餘綠禮盛燕臺人非楚材雲霞圖兮蘭爲閣金銀酒兮蓮作杯落英子徘徊風轉兮衰衰入黃扉兮灑錦石縈白蘋兮覆綠苔寒暑茫茫兮代謝故葉新花兮往來何秋日之可哀託芙蓉以爲媒

太平公主池山賦

粵若公主誕生皇家太平徵郡國以選號

叶時邕之美名孕靈蛾之秀彩輝婺女之
淳精虹美霓熠蘭香玉清稟金后之玄訓
係列聖之聰明厭綺羅與絲竹愛清池及
赤城構仙山兮既畢侔造化之神術其爲
狀也攢恠石而岑峯其爲異也含清風之
蕭瑟列海岸而爭聳分水亭而對出其東
則峯崖刻劃洞穴縈迴乍若風飄雨洒兮
移鬱島又似波沉浪息予見蓬萊圖萬重
于積石匿千嶺於天台荆門揭起兮壁峻
少室叢生兮劔開削成秀絕蓮華之覆高

掌獨立窈窕神女之戲陽臺爾其樵山釣
浦茅堂菌閣秘僊洞之瓊膏隱山家之場
藿煙岑水涯繚繞逶迤翠蓮瑤草的皪分
披映江濱而爛爛浮海上而纍纍迺之朶
與衡霍豈吾人之所爲向背重復參差反
覆翳蒼蒙龍含青吐紅陽崖奪景陰壑生
風奇樹抱石新花灌叢向若天長地久兮
苔蘚合古往今來兮林澗空始燕秦而開
影訪靈藥乎其中其西則翠屏巉岩山路
詰曲高閣祥雲丹岩吐綠忽兮既涉弱水

兮至崑崙杳兮宜乘龍溟兮向巴蜀狀岷
嶠兮連屬鬱氛氲兮斷續岩虛兮谷浚藏
清兮蓄韻含珠兮蘊玉衆彩兮明潤芳闈
暮兮白日沉爽氣浮兮黛壑深風泉活活
兮鳴石葛藟青青兮蔓岑羅八方之奇獸
聚六合之珍禽別有複道三襲平臺四注
跨渚兮交林蒸雲兮起霧鴛鴦水兮鳳凰
樓文虹橋兮彩鷁舟山池成兮帝子遊試
一望兮銷人憂召七賢集五侯棹浦曲席
岩幽鳴玉珮兮登降列金觴兮獻酬未窮

觀而極覽忽雲散而風流于是乎上客既
旋重扃巖閉榜童儼而高發綵女分而爲
衛牽水葉兮張水嬉摘山花兮詠山桂燕
偃鷗驚兮代所稀鳳舞鸞歌兮儼欲飛披
烟弄月兮宵未歸桂枝青露兮濕羅衣奕
弈濟濟兮夜旋玉邸隱隱崇崇兮朝趨帝
宮銀爐合席烟生霧集絳節繽紛楊光吐
文行軒即水去馬騰雲鏘鏘翼翼兮旋丹
闕趨向紫氛寵極兮慈掌情勤兮幽賞戀
宸房兮候幽入憶茲山兮來往採珠萼兮

山之側步蘭庭兮候顏色掇綠蘋兮于澗
潦宜室家于叶仇好即而貞心內潔淑則
遠傳談談者聞之而必勸缺薄者聞之而
凜然况復淮王招隱秦主隨仙弄子房之
琴瑟驅碧落之風烟賓屈宋於珠履引鄒
枚於玳筵秋華飛兮散紅樹春苔生兮覆
綠泉春秋寒暑兮歲榮落林巒沼沚于日
芳鮮吾君未享南山壽車騎往來千萬年

五言古詩

下桂江龍目灘

停午出灘險輕舟容易前峯攢入雲樹崖
噴落江泉巨石潛山恠深篁隱洞仙鳥遊
溪寂寂猿嘯嶺娟娟揮袂日凡幾我行途
已千暝投蒼梧郡愁枕白雲眠

初到陸渾山莊

授衣感窮節策馬凌伊關歸齊逸人趣日
覺秋琴閑寒露衰北阜夕陽破東山浩歌
步岑樾栖鳥隨我還

夜飲東亭

春水鳴大壑皓月吐層岑岑壑景色佳慰

我遠遊心暗芳足幽氣驚栖多衆音高興
南山曲長誅橫素琴

送趙六貞固

目斷南浦雲心醉東郊柳怨別此何時青
芳來已久與君共時物盡此盈樽酒始願
今不從春風戀携手

題張老松樹

歲晚東岩下周顧何悽惻日落西山陰衆
草起寒色中有喬松樹使我長嘆息百尺
無寸枝一生自孤直

夜渡吳松江懷古

宿帆震澤口曉渡松江濱櫂發魚龍氣舟
衝鴻鴈群寒潮頓覺滿暗浦稍將分氣赤
海生日光清湖起雲水鄉盡天衛嘆息爲
吳君謀士伏劍死至今悲所聞

別之望後獨宿藍田山莊

鶴鴒有舊曲調苦不成歌自嘆兄弟少常
嗟離別多爾尋北京路予卧南山阿泉晚
更幽咽雲秋尚差我藥欄聽蟬噪書幌見
禽過愁至願甘寢其如鄉夢何

浣紗篇贈陸上人

越女顏如花越王聞浣紗國微不自寵獻
作吳王娃女藪半潛匿苧羅更蒙遮一行
覆勾踐再顧傾夫差艷色奪常人數噸亦
相誇一朝還舊都靚粧尋若耶鳥驚入松
網魚畏沉荷花始覺冶容妾方悟羣心邪
欽子秉幽意世人共稱嗟願言托君懷倘
類蓬生麻家住雷門曲高閣凌飛霞淋漓
翠羽帳旖旎采雲車春風艷楚舞秋月纏
胡笳自昔專嬌愛襲玩唯矜奢達本知空

寂棄波猶泥沙未割偏執性自長薰牙
携妾下障道來上妾西家

桂州黃潭舜祠

虞世巡百越相傳葬九疑精靈遊北地祠
樹日光輝裡祭忽羣望丹青圖二妃神來
獸率舞仙去鳳還飛日暝山氣落江空潭
靄微帝鄉三萬里乘彼白雲歸

雨從箕山來

雨從箕山來倏與飄風度晴明西峯日綠
縹南溪樹此時客精廬幸蒙真僧顧深入

清淨理妙斷往來趣意得兩契如言盡共
忘諭觀花寂不動聞鳥懸可悟向夕聞天
香淹留不能去

初至崖口

崖口衆山斷欽崆聳天壁氣衝落日紅影
入春潭碧錦續織苔蘚丹青畫松石水禽
泛容與岩花飛的皜微路從此深我來恨
于役惆悵情未已羣峯暗將夕

黯

自湘源至潭州衡山縣

浮湘沿迅湍逗浦凝遠矚漸見江勢濶行

嗟水流漫赤岸雜雲霞綠竹緣溪澗向背
羣山轉應接良景晏沓障連夜猿平沙覆
陽鴈紛吾望闕客歸橈速已慣中道方泝
洄遲念自茲撰賴欣衡陽美持以蠲憂患
入崖口五渡寄李適

抱琴登絕壑伐木泝清川路極意謂盡勢
迴趣轉綿人遠草木秀山深雲影鮮余負
海嶠情自昔微尚然彌曠十餘載今來宛
仍前未窺仙源極獨進野人船時攀乳竇
憇屢薄天窗眠夜絃嚮松月朝楫弄苔泉

因冥象外理亦謝區中緣碧潭可遺老丹
砂堪學仙莫使馳光暮空令歸鶴吟

洞庭湖

地盡天水合朝及洞庭湖初日當中涌莫
辨東西隅晶耀目何在澄熒心欲無靈光
晏海若游氣耿天吳張樂軒皇至征苗夏
禹徂楚臣悲落葉堯女泣蒼梧野積九江
潤山通五嶽圖風恬魚自躍雲夕鴈相呼
獨此臨泛漾浩將人代殊永言洗氛濁卒
歲爲清娛要使功成退徒勞越大夫

景龍四年春祠海

宵

醒

蕭事祠春溟霄齋洗蒙慮雞鳴見日出鷺
下驚濤鷺地闊八荒近天迴百川注筵端
接空曲日外唯霏霧暖氣物象來周遊晦
明互致牲匪玄享禋滌期靈煦的的波際
禽泫泫島間樹安期今何在方丈蔑尋路
仙事與世隔冥搜徒已屢四明北羣山遺
老莫辨處撫中良自慨弱齡添恩遇三入
文史林兩拜神仙署雖嘆出關遠始知臨
海趣賞來空自多理勝孰能喻留楫竟何

待徙倚忽云暮

溫泉莊卧病寄楊七炯

多病卧兹嶺寥寥倦幽獨賴有高立山高
枕長在目兹山棲靈異朝夜翳雲族是日
濛雨晴返景入巖谷幕幕澗畔草青青山
下木此意方無窮環顧悵林麓伊洛何悠
漫洲源信重複夏餘鳥獸蕃秋末禾黍熟
秉頭守樊圃歸閑欣藝牧惜無載酒人徒
把涼泉掬

敬荅田徵君

家臨清溪水溪水繞盤石綠蘿四面垂
裊裊百餘尺風泉度絲管苔蘚鋪茵席傳聞
潁陽人霞外漱靈液忽枉巖中翰吟卧朝
復夕何當遂遠遊物色候逋客

自衡陽至韶州謁能禪師

謫居甯炎壑孤帆淼不繫別家萬里餘流
目三春際猿啼山館曉虹飲江臯霽湘岸
竹泉幽衡峯石閣閉嶺嶂窮攀越風濤極
沿濟吾師在衡陽欣此得躬詣洗慮賓空
寂香焚結精誓願以有漏軀聿薰無生惠

物用益冲曠心源日閑細伊我獲此途游
道廻晚計宗師信捨法擯落文史藝坐禪
羅浮中尋異南海裔何辭禦魑魅自可乘
炎癘廻首望舊鄉雲林浩虧蔽不作別離
苦歸期多年歲

見南山夕陽召監師不至

夕陽黯晴暮山翠互明滅此中意無限要
與開士說徒鬱仲舉思唯廻道林轍孤興
欲待誰待此湖上月

遊法華寺

薄遊京都日遙羨稽山名分刺江海郡謁
來徵素情松露洗心眷象筵敷念誠薄雲
界青嶂皎日騫朱薨苔澗深不測竹房閑
且清感真六象見垂兆二鷗鳴古今信靈
跡中州莫與京林巘永栖業豈伊佐一生
浮悟雖已久事試去來成觀念幸相續庶
幾最後明

宿雲門寺

雲門若耶裡泛鷁路纔通夤緣綠篠岸遂
得青蓮宮天香衆壑滿夜梵前山空漾漾

潭際月飄飄杉上風
茲焉多嘉遯數子今
莫同鳳歸慨處士鹿
化聞仙公樵路鄭州
北舉井阿巖東永夜
豈云寐曙華忽葱龍
谷鳥轉尚澁源桃驚
未紅再詠期春暮當
造林端窮庶幾蹤謝
客開山投剡中

春湖古意

院梅發向尺園鳥復
成曲落日遊南湖果
擲顏如玉含情不得
語轉盼知所屬惆悵
未可歸寧關須林藁

息夫人

可憐楚破息腸斷息
夫人仍爲泉下骨不
作楚王嬪楚王寵莫
盛息君情更親情親
怨生別一朝俱殺身

有所思

君子事行役再空芳
歲期美人曠遙佇萬
里浮雲思園桃綻紅
艷郊葉萋綠滋坐看
長夏晚秋月生羅帷

長安路

秦地平如掌層城出
雲漢樓閣九衢春車
馬千門旦綠柳開復
合紅塵聚還散日晚

鬪鷄場經過狹斜看

折楊柳

玉樹朝日映羅帳春風吹拭淚攀楊柳長
條宛地垂白花飛歷亂黃鳥思參差妾自
肝腸斷傍人那得知

芳樹

何地早芳菲宛在長門殿天樨色若綬穠
李光如練啼鳥弄花踈遊蜂飲香遍歎息
春風起飄零君不見

遊陸渾南山自歇馬嶺到楓香林

以詩代書答李舍人適

晨登歇馬嶺遙望伏牛山孤出群峯首巖
熊元氣間太和亦崔嵬石扇橫閃倏細岑
互攢倚浮巘競奔蹙白雲遙入懷青雲近
可掬徒尋靈異迹周顧愜心目晨拂鳥路
行暮投人煙宿間關踏雲雨繚繞緣水木
西見商山芝南到楚鄉竹楚竹幽且深半
雜楓香林浩歌青潭曲寄爾桃源心

送武進鄭明府

絃歌試宰日城闕賞心違北謝蒼龍去南

隨黃鵠飛夏雲海中出吳山江上微吐歌
豈云遠從此慶緇衣

早發大庾嶺

晨躋大庾險驛鞍馳復息霧露晝未開浩
途不可測崿起華夷界信爲造化力歇鞍
問徒旅鄉關在西北出門怨別家登嶺恨
辭國自惟最忠孝斯罪懵所得皇明頗昭
洗廷議日紛惑兄弟遠淪居妻子成異域
羽翼傷已毀童幼憐未識踟躕戀北顧亭
午晞霽色春暖陰梅花瘴回陽鳥翼含沙
緣澗聚吻草依林植適蠻悲疾首懷鞏淚
沾臆感謝鵷鷺朝勤修魑魅職生還倘非
遠誓擬酬恩德

自洪府舟行直書其事

仲春辭國門畏途橫萬里越淮乘楚嶂造
江泛吳汜嚴程無休隙日夜涉風水昔聞
垂堂言將誠千金子問余何奇剝遷竄極
炎鄙揆已道德餘幼聞虛白旨貴身賤外
物抗跡遠塵軌朝遊伊水湄夕卧箕山趾
妙年拙自晦皎潔美文史謬辱紫泥書揮

翰青雲裏事往每增傷寵來常誓止銘骨
懷
逆鱗讓金紫安謂覺潛搆退耕禍
猶起栖巖實吾策觸蕃誠內耻濟濟同時
人台庭鳴劔履愚以卑自衛兀坐去沉滓
迨茲理已極竊位申知己群議負宿心獲
戾光華始黃金忽銷鑠素業坐淪毀浩歎
誣平生何獨戀松梓浦樹浮鬱鬱皋蘭覆
靡靡百越去菟斷九疑望心死未盡匡阜
遊遠欣羅浮美周旋本師訓佩服無生理
異國多靈僊幽探忘年紀敝廬嵩山下空
谷茂蘭芷悠悠南溟遠採掇長已矣

下桂江縣黎壁

放溜靚前淑連山分上千江回雲壁轉天
小霧峯攢吼沫跳急浪合流環峻灘欹離
出漩劃繚繞避渦盤舟子怯桂水最云斯
路難吾生抱忠信吟嘯自安閑旦別已千
歲夜愁勞萬端企予見夜月委曲破林巒
潭曠竹煙盡洲香橋露團豈傲夙所好對
之與俱歡思君罷琴酌泣此夜漫漫

入瀧州江

孤舟泛盈盈江流日縱橫夜雜蛟螭寢晨
披瘴癘行潭蒸水沫起山熱火雲生猿躩
時能嘯鳶飛莫敢鳴海窮南徼盡鄉遠北
菟驚泣向文身國悲看鑿齒氓地偏多有
蠱風惡好相鯨余本巖栖客悠哉慕玉京
厚恩常顧咎薄宦不祈成違隱乖求志披
荒爲近名鏡愁玄髮改心負紫芝榮運啓
中興曆時逢外域清穢應保忠信延促付
神明

始安秋日

桂林風景異秋似洛陽春晚霽江天好分
明愁殺人卷雲山觶觶碎石水磷磷世業
事黃老妙年孤隱淪歸歟卧滄海何物貴
吾身

晚泊湘江

五嶺恹惶客三湘顛顛顏况復秋雨霽表
裏見衡山路逐鵬南轉心依鴈北還唯餘
望鄉淚更染竹成班

奉使嵩山途經緱嶺

侵星發洛城城中歌吹聲畢景至緱嶺嶺

上煙霞生草樹饒野意山川多古情大隱
德所滿歸來可退耕

傷王七祕書監寄呈陽州陸表史
通簡府僚廣陵好事

王氏貴先宗衡門棲道風得心一作悟有

物秉化遊無窮學奧一作瞻九流異機玄三

語同書乃墨塲絕文稱詞伯雄白屋藩魏

主蒼生期謝公一祇賢良詔遂謁承明宮

補衮望奚塞尊儒位未充罷官七門裏歸

老一丘中嘗忝長者轍微言私謂通我行

會稽郡路出廣陵東物在人已矣都疑淮

海空

使至嵩山尋杜四不遇慨然復傷

田洗馬韓觀主因以題壁贈杜侯

杜四

洛橋瞻大室期子在雲烟歸來不相見孤

賞弄寒泉與君闊松石于茲二十年田公

謝昭世韓子秘幽埏憶昔同携手山棲接

二賢笙歌入玄地詩酒生寥天舊友悉零

落罷琴私自憐遊者非藥誤食霞意可全

爲餘理還策相與事靈仙

翫郡齋海榴

澤國韶氣早開簾延霽天野禽宵未轉山
蜚晝仍眠日茲海榴發列映巖楹前熠爚
禦風靜歲蕤含景鮮清晨綠堪佩亭午丹
欲燃昔忝金閨籍嘗見玉池蓮未若宗族
地更逢榮耀全南金雖自貴賀賞詎能遷
撫躬萬里絕豈染一朝妍徒緣滯遐郡常
是惜流年越俗鄙章甫捫心空自憐

七言古詩十六首

下山歌

下嵩山兮多所思携佳人兮步遲遲松間
明月長如此君再遊兮復何時

軍中人日登高贈房明府

幽郊昨夜陰風斷頓覺朝來陽吹暖涇水
橋南柳欲黃杜陵城北花應滿長安昨夜
寄春衣短翮登茲一望歸聞道凱旋乘騎
入看君走馬見芳菲

寒食陸渾別業

洛陽城裏花如雪陸渾山中今始發旦別

河橋楊柳風夕卧伊川桃李月伊川
正芳新寒食山中酒復春野老不知
堯舜力酣歌一曲太平人

寒食江州滿塘驛

去年上巳洛橋邊今年寒食廬山曲
遙憐鞏樹花應滿復見吳洲草新綠
吳洲春草蘭杜芳感物思歸懷故鄉
驛騎明朝發何處猿聲今夜斷君腸

至端州驛見杜五審言沈三佺期
關五朝隱王二無兢題壁慨然成

咏

逐臣北地承嚴譴調到南中每相見
豈意南中岐路多千山萬水分鄉縣
雲採雨散各翻飛海濶天長音信稀
處處山川同瘴癘自憐能得幾人歸

明河篇

八月涼風天氣清萬里無雲河漢明
昏見南樓清且淺曉落西山縱復橫
洛陽城闕天中起長河夜夜千門裏
複道連薨共蔽虧畫堂瓊戶特相宜
雲母帳前初泛濫水

晶簾外轉逶迤倬彼昭回如練白復出東
城接南陌南陌征人去不歸誰家今夜擣
寒衣鴛鴦機上踈螢度烏鵲橋邊一鴈飛
鴈飛螢度愁難歇坐見明河漸微沒已能
舒卷任浮雲不惜光輝讓流月明河可望
不可親願得乘槎一問津更將織女支機
石還訪城都賣卜人

龍門應制

宿雨霽氛埃流雲度城闕河堤柳新翠苑
樹花先發洛陽花柳此時濃山水樓臺映

幾重群公拂霧朝翔鳳天子乘春幸鑿龍
鑿龍近出王城外羽從淋漓擁軒蓋雲蹕
纒臨御水橋天衣已入香山會山壁斬巖
斷復連清流澄徹俯伊川塔影遙遙綠波
上星龕奕奕翠微邊層巒舊長千尋木遠
壑初飛萬丈泉綵仗紅旌遶香閣下輦登
高望河洛東城宮闕擬昭回南陌溝塹殊
綺錯林下天香七寶臺山中有酒萬年杯
微風一起祥花落仙樂初鳴瑞鳥來鳥來
花落紛無已稱觴獻壽香霞裡歌舞淹留

景欲斜石間猶駐五雲車
鳥旗翼翼留芳草龍騎駸駸映晚花
千乘萬騎鑿輿出水靜山空嚴警蹕
郊外喧喧引看人傾都南望屬車塵
囂聲引颺聞黃道王氣周回入紫宸
先王定鼎山河固寶命乘周萬物新
吾君不事瑤池樂時雨來觀農扈春

有所思

洛陽城東桃李花飛來飛去落誰家
幽閨女兒惜顏色坐見落花長歎息
今年花落顏色改明年花開復誰在
已見松柏摧爲薪更聞桑田變成海
古人無復洛城東今人還對落花風
年季歲歲花相似歲歲季年人不同
寄言全盛紅顏子須憐半死白頭翁
此翁白頭真可憐伊昔紅顏美少年
公子王孫芳樹下清歌妙舞落花前
光祿池臺文錦綉將軍樓閣畫神仙
一朝卧病無相識三春行樂在誰邊
婉轉蛾眉能幾時須臾鶴髮亂如絲
但看古來歌舞地唯有黃昏鳥雀飛

王子喬

王子喬愛神仙七月七日上賓天白虎採
瑟鳳吹笙乘騎雲氣喻日精喻月精長不
歸遺廟今在而人非空望山頭艸草露濕
人衣

嵩山天門歌

登天門兮坐盤石之磷砢前澁澁兮未半
下溟漠兮無垠紛窈窕兮巖倚披以鵬翅
洞膠葛兮峯稜層以龍鱗松移岫轉左變
而右易風生雲起出鬼而入神吾亦不知
其靈惟如此願遊杳冥兮見羽人重曰天
門于穹崇迴合兮攢叢松萬接兮柱日石
千尋于倚空晚陰兮足風夕陽于艷紅試
一望兮奪魄况衆妙之無窮

冬霄引

河有冰兮山有雪北戶墜兮行人絕獨坐
山中于對松月懷美人于屢盈缺明月的
的寒潭中青松幽幽吟徑風此情不向俗
人說愛而不見恨無窮

放白鷗篇

故人贈我綠綺琴兼致白鷗鳥琴是嶧山

桐鳥出吳溪中我心松石清霞裡
弄此幽絃不能已我心河海白雲垂
憐此珍禽空自知著書晚下麒麟閣
幼稚驕痴候門樂乃言物性不可違
白鷗愁慕刷毛衣玉徽閉匣留爲念
六翮開籠任爾飛

綠竹引

青溪綠潭潭水側脩竹婣娟同一色
徒生仙實鳳不遊老死空山人詎識
妙年秉願逃俗紛歸臥嵩丘弄白雲
含情傲睨慰心目何可一日無此君

桂州三月三日

代業京華裏遠投魑魅鄉登高望不見雲
海四茫茫伊昔承休盼曾爲人所羨兩朝
賜顏色二紀陪遊宴昆明御宿侍龍媒伊
闕天泉復幾迴西夏黃河水心劍東周清
洛羽觴杯苑中落花掃還合河畔垂楊撥
不開千春獻壽多行樂栢梁和歌攀睿作
賜金分帛駐光輝風舉雲遙入紫微晨趨
北闕鳴珂至夜出南宮把燭歸載筆儒林
多歲月僕被文昌佐吳越越中山海高且

深興來無處不登臨永和九年刺海郡暮
春三月醉山陰愚謂嬉遊長似昔不言流
寓歎成今始安繁華舊風俗悵飲傾城沸
江曲主人絲管清且悲客子肝腸斷還續
荔浦蘅臯萬里餘洛陽音信絕能踈故園
今日應愁思曲水何能更袞除作伴誰憐
合浦葉思歸豈食桂江魚不求漢使金囊
贈願得佳人錦字書

初宿淮口

孤舟汴河水去國情無已晚泊投楚鄉明
月清淮裏汴河東瀉路窮茲洛陽西顧日
增悲夜聞楚歌思欲斷况值淮南木落時

高山引

攀雲窈窕兮上躋懸峯長路浩浩兮此去
何從水一曲兮膠一曲山一重兮悲一重
松檟邈已遠友于何日逢况滿室兮童稚
攢衆慮於心胸天高難訴兮遠負明德却
望咸京兮揮涕龍鍾

宋之問集卷上

宋之問集卷下

五言律詩七十四首

五言排律二十八首

七言律詩三首

五言絕句九首

七言絕句七首

五言律詩

夏日仙夢亭應制

高嶺逼星河乘輿此日過野含時雨潤山
雜夏雲多睿藻光岩穴宸襟洽薜蘿悠然

小天下歸路滿笙歌

春日芙蓉園侍宴應制

芙蓉秦地沼盧橘漢家園
谷轉斜盤徑川迴曲抱源
風來花自舞春入鳥能言
侍宴瑤池夕歸途騎吹繁

扈從登封告成頌

複道開行殿鈎陳列禁兵
和風吹鼓角佳氣動旗旌
後騎迴天苑前山入御營
萬方俱下拜相與樂昇平

松山嶺

翼翼高旌轉鏘鏘鳳輦飛塵銷
清蹕路雲濕從臣衣
白羽搖丹壑天營逼翠微
芳聲耀今古四海警宸威

麟趾殿侍宴應制

北闕層城峻西宮複道懸
乘輿歷萬戶置酒望三川
花柳含丹日山河入綺筵
欲知陪賞處空外有飛煙

上陽宮侍宴應制得林字

廣樂張前殿重裘感聖心
砌莫霜月盡庭樹雪雲深
舊渥驂宸御慈恩忝翰林
微臣

一何幸再得聽瑤琴

登禪定寺閣

梵宇出三天登臨望八川
開襟坐霄漢揮手拂雲烟
函谷青山外昆明落日邊
東京楊柳陌少別已經年

泛鏡湖南溪

乘興入幽棲舟行日向低
岩花候冬發谷鳥作春啼
沓嶂開天小叢篁夾路迷
猶聞可憐處更在若耶溪

題大庾嶺北驛

陽月南飛鴈傳聞至此迴
我行殊未已何日復歸來
江靜潮初落林昏瘴不開
明朝望鄉處應見隴頭梅

陸渾山莊

歸來物外情負杖闕岩耕
源水看花入幽林採藥行
野人相問姓山鳥自呼名
去去獨吾樂無能愧此生

途中寒食

馬上逢寒食途中屬暮春
可憐江浦望不見洛陽人
北極懷明主南溟作逐臣
故園

賜斷處日夜柳條新

春日山家

今日遊何處春泉洗藥歸悠然紫芝曲畫
掩白雲扉魚躍徧尋藻人閑屢采微丘中
無信事身世兩相違

九月九日登慈恩寺浮圖應制

鳳剝侵雲半虹旌倚日邊散花多寶塔張
樂布金田時菊芳仙醞秋蘭動睿篇香街
稍欲晚清蹕扈歸天

奉和聖制閏九月九日登莊嚴總

持二寺閣

閏月再重陽仙輿歷寶坊帝歌雲稍白御
酒菊猶黃風鐸喧行漏天花拂舞行豫遊
多景福梵宇日生光

奉和梁王宴龍泓應教

得微字

水府淪幽壑星輶下紫微鳥驚司僕馭花
落侍臣衣芳樹搖春晚晴雲繞座飛淮王
正留客不醉莫言歸

奉和聖製立春剪綵花應制

金閣粧仙杏瓊筵弄綺梅人間都未識天

上忽先開蝶繞香絲住蜂憐彩艷迴今年
春色早應為剪刀催

春日宴宋主簿山亭得寒

公子正邀歡林亭春未闌攀岩踐苔易迷
路出花難窅覆垂楊暖堦侵瀑水寒帝城
歸路直留興接鶴鸞

緱山廟

王子賓仙去飄飄笙鶴飛徒聞滄海變不
見白雲歸天路何其遠人間此會稀空歌
日云暮霜月漸微微

奉和九日侍宴應制

令節三秋晚重陽九日歡仙杯還泛菊寶
饌且調蘭御氣雲霄近乘高宇宙寬今朝
萬壽別宜向曲中彈

奉和九日登慈恩寺浮圖應制

瑞塔千尋起仙輿九日來萸房陳寶席菊
蕊散花臺御氣鵬霄近升高鳳野開天歌
將梵樂空裏共徘徊

送沙門弘景道俊玄奘還荊州應

制

三乘歸淨域萬騎餞通裝就日離亭近彌
天別路長荆南旋杖鉢渭北限津梁何日
紆真果還來入帝鄉

春日芙蓉園侍宴應制

年光竹裏遍春色杏間遙煙氣籠青閣流
文蕩盡橋飛花隨蝶舞艷曲伴鶯嬌今日
陪歡豫還疑陟紫霄

詠笛

羗笛寫龍聲長吟入夜清關山孤月下
來向隴頭鳴逐吹梅花落含春柳色驚行觀

向子賦坐憶舊隣情

詠鍾

既接南隣磬還隨北里笙平陵通曙響長
樂警宵聲秋至含霜動春歸應律鳴豈惟
恒待扣金簾有餘清

送朔方何侍郎

聞道雲中使乘驄往復還河兵守陽日塞
虜失陰山拜職嘗隨驃銘功不讓班旋聞
受降日歌舞入蕭關

答李司戶

遠方來下客，輜軒攝使臣。
美琴宜在夜，傾酒貴逢春。
駟馬留孤館，雙魚贈故人。
明朝散雲雨，遙仰德爲隣。

花落

鉄騎幾時迴，金閨怨早梅。
雪寒花已落，風暖葉還開。
夕逐新春管，香迎小歲杯。
盛時何足貴，書裏報輪臺。

江亭晚望

浩渺浸雲根，煙嵐出遠村。
鳥歸沙有跡，帆過浪無痕。
望水知柔性，看山欲斷魂。
縱情猶未已，迴馬歎黃昏。

猶未已迴馬歎黃昏

扈從登封途中作

帳殿鬱崔嵬，仙遊實壯哉。
曉雲連暮捲，夜火雜星回。
谷暗千旗出，山鳴萬乘來。
扈從良可賦，終乏揆天材。

旅宿淮陽亭口號

日暮風亭上，悠悠旅思多。
故鄉臨桂水，今夜渺星河。
暗草霜華發，空庭鴈影過。
興來誰與語，勞者自爲歌。

駕出長安

聖德超千古皇風扇九圍天迴萬象出駕
勳六龍飛泝氣來黃道祥雲覆紫微太平
多扈從文物有光輝

幸少林寺應制

紺宇橫天室迴鑿指帝休曙陰迎日盡春
氣抱岩流空樂繁行漏香烟薄綵游玉膏
從此泛仙馭接浮丘

江南曲

妾往越城南離居不自堪採花驚曙鳥摘
葉餒春蠶懶結茱萸帶愁安玳瑁簪侍臣

消瘦盡日暮碧江潭

岳寺應制

暫幸珠筵地俱憐石瀨清泛流張翠幕拂
迥挂紅旌雅曲龍調管芳罇蟻泛觥陪歡
玉座晚復得聽金聲

冬夜寓直麟閣

直事披三省重關秘七門廣庭憐雪淨深
屋喜爐溫月幌花虛馥風窓竹暗喧東山
白雲意茲夕寄琴樽

寄天台司馬道士

卧來生白髮覽鏡忽成絲遠媿食霞子童
顏且自持舊遊惜踈曠微尚日磷緇不寄
西山藥何由東海期

送田道士使蜀投龍

風馭忽泠然雲臺路幾千蜀門峯勢斷巴
字水形連人隔壺中地龍遊洞裏天贈言
迴馭日圖盡彼山川

遊韶州廣界寺

影殿臨丹壑香臺隱翠霞巢飛含象鳥砌
蹋雨空花寶鐸採初霽金池映晚沙莫愁

歸路遠門外有三車

宿濟遠峽山寺

香岫懸金刹飛泉界石門空山唯習靜中
夜寂無喧說法初聞鳥看心欲定猿寥寥
隔塵事何異武陵源

秋晚遊普耀寺

薄暮曲江頭仁祠暫可留山形無隱霽野
色遍呈秋花覆香泉密藤緣寶樹幽平生
厭塵事過此忽悠悠

使往天兵軍馬約與陳子昂新鄉

爲期及還而不相遇

入衛期之子吁嗟不少留情人去何處淇
水日悠悠恒碣青雲斷衡漳白露秋知君
心許國不是愛封侯

送許州宋司馬赴任

潁郡水東流荀陳兄弟遊偏傷茲日遠獨
向聚星州河潤在明德人康非外求當聞
力爲政遙慰我心愁

送趙司馬赴蜀州

餞子西南望煙綿劍道微橋寒金鴈落林
曙碧雞飛職拜輿方遠仙成履會歸定知
和氏璧遙掩玉輪輝

送永昌蕭贊府

柳變曲江頭送君函谷遊弄琴寬別意酌
酒醉春愁戀本亦何極贈言微所求莫令
金谷水不入故園流

送李侍御

行李戀庭闈乘輶振綵衣南登指吳服北
走出秦畿去國夏雲斷還鄉秋鴈飛旋聞
郡計入更有使臣歸

錢湖州薛司馬

別駕促巖程。離筵多故情。交深季作友。義重伯爲兄。鎮靜移吳俗。風流在漢京。會看陳仲舉。從此拜公卿。

送杜審言

卧病人事絕。聞君萬里行。河橋不相送。江樹遠含情。別路追孫楚。維舟吊屈平。可惜龍泉劍。流落在豐城。

留別之望舍弟

同氣有三人。分飛在此晨。西馳巴嶺徼。東去洛陽濱。強飲離前酒。終傷別後神。誰憐散花萼。獨赴日南春。

漢江宴別

漢廣不分天。舟移杳若仙。秋虹映晚日。江鶴弄晴烟。積水浮冠蓋。遙風逐管絃。嬉遊不可極。留恨此山川。

端州別袁侍郎

合浦塗未極。端溪行暫臨。淚來空泣臉。愁至不知心。客醉山月靜。猿啼江樹深。明朝共分手。之子愛千金。

渡吳江別王長史

倚棹望茲川，銷魂獨黯然。
鄉連江北樹，雲斷日南天。
劍別龍初沒，書成鴈不傳。
離舟意無限，催渡復催年。

度大庾嶺

度嶺方辭國，停輶一望家。
魂隨南翥鳥，淚盡北枝花。
山雨初含霽，江雲欲變霞。
但令歸有日，不敢恨長沙。

過蠻洞

越嶺千重合，蠻溪十里斜。
竹迷樵子徑，萍匝釣人家。
林暗交楓葉，園香覆橘花。
誰憐在荒外，孤賞足雲霞。

經梧州

南國無霜霰，連年見物華。
青林暗換葉，紅藥續開花。
春去聞山鳥，秋來見海槎。
流芳雖可悅，會自泣長沙。

送姚侍御出使江東

帝憂河朔郡，南發海陵倉。
坐歎青春別，遙迤碧水長。
飲水朝受命，衣錦晝還鄉。
爲問東山桂，無人何自芳。

內題賦得巫山雨

神女向高唐巫山下夕陽徘徊作行雨婉
戀遂荆王電影江前落雷聲峽外長霽雲
無處所臺館曉蒼蒼

王昭君

非君惜鸞殿非妾妬娥眉薄命由驕虜無
情是畫師嫁來胡地日不竝漢宮時辛苦
無聊賴何看上馬辭

銅雀臺

昔年分鼎地今日望陵臺一旦雄圖盡千
秋遺令開綺羅君不見歌舞妾空來思共
漳河水東流無重迴

牛女

粉席秋期緩針樓別怨多奔龍爭渡月飛
鵲亂填河失喜先臨鏡含羞未解羅誰能
留夜色來夕倍還梭

巫山高

巫山峯十二環合象昭回俯聽琵琶峽平
看雲雨臺古槎天外落瀑水日邊來何忍
猿啼夜荆王枕席開

望月有懷

天使下西樓含光萬里秋臺前似掛鏡簾
外如懸鈎張尹將眉學班姬取扇儔佳期
應借問爲報在刀頭

壽陽王花燭圖

仙媛乘龍日天孫捧鴈來可憐桃李徑更
繞鳳凰臺燭照香車入花臨寶扇開莫令
銀箭曉爲盡合歡杯

過史正議宅

舊交此零落雨泣訪遺塵
劔几傳好事池臺傷故人
國香蘭已歇里樹橘猶新
不見吳中隱空餘江海濱

梁宣王挽詞三首

貴藩堯母族外戚漢家親
業重興王際功高復辟辰
愛賢唯報國樂善不防身
今日衣冠送空傷置醴人

又

金精何日閉玉匣此時開
東望連吾子南瞻近帝臺
地形龜食報墳土燕銜來
可歎虞歌夕紛紛騎吹迴

又

像設千年在平生萬事違
綵旌翻葆吹圭
翼奠靈衣壘日寒無影
郊雲凍不飛
君王留此地駟馬欲何歸

魯忠王挽詞三首

同盟會五月歸
葵出三條日
慘咸陽樹天
寒渭水橋
稍看朱鷺轉
尚識紫駟驕
寂寂泉臺恨
從茲罷玉簫

又

邦家錫寵光存沒
貴忠良
遂裂山河地
追尊父子王
人悲槐里月
馬踏槿原霜
別向天京北
悠悠此路長

又

樹羽迎朝日
撞鍾望早霞
故人悲宿草
中使慘晨笳
氣有衝天劍
星無犯斗槎
唯餘孔公宅
長接魯王家

范陽王挽詞二首

賢相稱邦傑
清流舉代推
公才掩諸夏
文體變當時
賓吊翻成鶴
人亡惜喻龜
洛陽今紙貴
猶寫太冲詞

又

贈秩徽章洽求書祕草成客隨朝露盡人
逐夜舟驚蒿里衣冠送松門印綬迎誰知
楊伯起今日重哀榮

故趙王屬贈黃門侍郎上官公挽

詞二首

韋門旌舊德班氏業前書謫去因丞相歸
來爲婕妤周原烏相塚越嶺鴈隨車溟漠
辭昭代空憐賦子虛

又

綠車隨帝子青瑣翊宸機昔枉朝歌騎今
虛夕拜闈柳河悽挽曲薤露濕靈衣一厝
窮泉閉雙鸞遂不飛

山莊

宦遊非吏隱心事好幽偏考室先依地爲
農且用天輞川朝伐木藍水暮澆田馱子
泰山老相歡春酒泉

五言排律

奉和幸三會寺應制

六飛迴玉輦雙樹謁金仙瑞鳥呈書字神

龍吐玉泉淨心遙証果睿相獨超禪塔湧
香花地山圍日月天梵音迎漏徹空樂倚
雲懸今日登仁壽長看法鏡圓

奉和幸神皋亭應制

清蹕喧黃道乘輿降紫宸霜戈凝曉日雲
管發陽春臺古今疑漢林餘半識秦宴酣
詩布澤節改令行仁昔恃山河險今依道
德淳多慚獻嘉頌空累屬車塵

奉和幸長安故城未央宮應制

漢王未息戰蕭相乃營宮壯濂一朝盡威
靈千載空皇明悵前跡置酒宴群公寒輕
綵仗外春發幔城中樂思迴斜日歌詞繼
大風今朝天子貴不假叔孫通

奉和晦日幸昆明池應制

春豫靈池會滄波帳殿開舟凌石鯨度槎
拂斗牛迴節晦賞全落春遲柳暗催象溟
看浴景燒劫辨沉灰鎬飲周文樂汾歌漢
武才不愁明月盡自有夜珠來

使過襄陽登鳳林寺閣

香閣臨清漢丹梯隱翠微林篁天際密人

世谷中違苔石銜仙洞蓮舟泊釣磯山雲
浮棟起江雨入庭飛信美雖南國嚴程限
北歸幽尋不可再留步惜芳菲

登粵王臺

江上粵王臺登高望幾回南溟天外合北
戶日邊開地濕烟常起山晴雨半來冬花
採盧橘夏果摘楊梅跡類虞翻枉人非賈
誼才歸心不可見白髮重相催

春日鄭協律山亭陪宴餞鄭卿

樓

潘園枕郊郭愛客坐相求尊酒東城外驂
駢南陌頭池平分洛水林缺見嵩丘暗竹
侵山徑垂楊拂妓樓彩雲歌處斷遲日舞
前留此地何年別蘭房空自幽

扈從登封告成頌應制

御路廻中岳天營接下都百靈無後至萬
國競前驅文衛嚴清蹕幽仙讀寶符貝花
明漢果芝草入堯厨濟濟衣冠會喧喧夷
夏俱宗裡仰神理刊木望川途撫已貧非
病時來本不愚願陪丹鳳輦率舞白雲衢

奉和幸韋嗣立山莊侍宴應制

樞掖調梅暇林園藝槿初入朝榮劔履退
食偶琴書地隱東岩室天迴北斗車旌門
臨窅窳輦道屬扶踈雲漢明丹壑霜笳徹
紫虛水疑投石處溪似釣璜餘帝澤頒卮
酒人歡頌里閭一承黃竹詠長奉白茆居

和姚給事寓直之作

清論滿朝陽高才拜夕郎還從避馬路來
接珥貂行寵就黃扉日威迴白簡霜栢臺
遷鳥茂蘭署得人芳禁靜鍾初徹更踈漏
更長曉河低武庫流火度文昌寓直光輝
重乘秋藻翰揚暗投空欲報下調不成章

早發始興江口至虛氏村作

候曉踰閩嶠乘春望越臺宿雲鵬際落殘
月蚌中開薜荔搖青氣枕柳翳碧苔桂香
多露裊石嚮細泉回抱葉玄猿嘯啣花翡
翠來南中雖可悅止思日悠哉鬢髮俄成
素丹心已作灰何當首歸路行剪故園菜

遊雲門寺

維舟探靜域作禮事尊經投跡一蕭散為

後巧而不
首其備而
以初知

心自杳冥龕依大禹穴樓倚少微星沓嶂
圍蘭若迴溪抱竹庭覺花塗砌白甘露洗
山青鴈塔騫金地虹橋轉翠屏人天宵現
景神鬼晝潛形理勝常虛寂緣空自感靈
入禪從鵠繞說法有龍聽劫累終期滅塵
躬且未寧搖搖不安寐待月詠岩扃

發藤州

朝夕苦遄征孤魂長自驚泛舟依鴈渚投
館聽猿鳴石髮緣溪蔓林衣掃地輕雲峯
刻不似苔蘚畫難成露裊千花氣泉和萬
籟聲攀幽紅處歇躋險綠中行戀切芝蘭
砌悲纏松柏坐丹心江北死白髮嶺南生
魑魅天邊國窮愁海上城勞歌意無限今
日爲誰明

宴安樂公主宅

得空字

英藩築外館愛主出王宮賓至星槎落仙
來月宇空玳梁翻賀燕金埒倚晴虹蕭去
秦臺裏書開魯壁中短歌能駐日艷舞欲
嬌風聞有淹留處山阿滿桂叢

遊禹穴迴出石耶

禹穴今朝到耶溪此路通著書聞太史鍊
藥有仙翁鶴往籠猶掛龍飛劍已空石帆
搖海上天鏡落湖中水底零露白山邊墜
葉紅歸舟何慮晚日暮使樵風

奉和幸薦福寺

寺即中
宗舊宅

香刹中天起宸遊滿路輝乘龍太子去駕
象法玉歸殿飾金人影窻採玉女扉稍迷
新草木遍識舊庭闈水入禪心定雲從寶
思飛欲知皇劫遠初拂六銖衣

遊稱心寺

釋事懷三隱清襟謁四禪江鳴潮未落林
曉日初懸寶葉交香雨金沙吐細泉望諧
舟客趣思發海人煙顧捩仍留馬乘杯久
棄船未憂龜負岳且識鳥耘田理契都無
象心冥不寄筌安期庶可揖天地得齊年

遊法華寺

高岫擬耆闍真乘引妙車空中結樓殿意
表出雲霞後果纏三足前因感六牙宴林
薰寶樹水溜滴金沙寒谷梅猶淺温庭橘
未華臺香紅藥亂塔影綠篁遮果漸輪王

族緣超梵帝家晨行踏忍草夜誦得靈花
江郡將何匹天都亦未加朝來沿泛所應
是逐僊槎

奉和薦福寺應制

梵筵光聖邸仙豫覽宏規不改靈光殿因
開功德池蓮生新步葉桂長昔攀枝湧塔
庭中見飛樓海上移聞韶三月幸觀象七
星危欲識龍歸處朝來雲氣隨

和庫部李員外秋夜寓直之作

相庭貽慶遠才子拜即初起草儀仙閣焚
香卧直廬更深河欲斷節勁柳徧踈氣耿
凌雲筆心揺待漏車叨榮厠儔侶省己惡
空虛徒斐陽春和難參麗曲餘

酬李丹徒見贈之作

鎮吳稱粵里試劇仰通才近挹人披霧遙
聞境震雷一朝逢解榻累日共啣盃連轡
登山盡浮舟望海迴以予慚拙宦期子遇
良媒贈曲南鳧斷征途北鴈催更憐江上
月還入鏡中開

早發韶州

炎徼行應盡迴瞻鄉路遙珠厓天外郡銅
柱海南標日夜清明少春冬霧雨饒身經
大火熱顏入瘴江消觸影含沙怒逢人女
草採露濃看茵濕風颭覺船飄直禦魑將
魅寧論搗與鷄虞翻思報國許靖願歸朝
綠樹秦京道青雲洛水橋故園長在日蒐
去不須招

宋公宅送竇諫議

宋公爰創宅庾氏更誅茅間出人三秀平
臨楚四郊漢臣來絳節荆牧勳金鏡樽溢
宜城酒笙裁曲沃匏露荷秋變節風柳夕
鳴稍一散陽臺雨方隨越鳥巢

送合宮蘇明府

鉉府誕英規公才天下知謂乘羔鴈族繼
入鳳凰池赤縣求人隱青門起路岐程迴
車少別鳧化鳥遙馳神哭周南境童歌渭
北乘賢哉荀奉倩袞職佇來儀

送楊六望赴金水

借問梁山道欽岑幾萬重遙州乃作路絕
壁劔爲峯惜別路窮此留歡意不從憂來

生白髮時晚愛青松勿以西南遠夷歌寢
盛容台階有高位寧復久臨叩

發端州初入西江

問我將何去清晨泝越溪翠微懸宿雨丹
壑飲晴霓樹影稍雲密藤陰覆水低潮田
出浦駛洲轉望鄉迷人意長懷北江行日
向西破顏看鵲喜拭淚聽猿啼骨肉初分
愛親朋忽解携路遙魂欲斷身辱理能齊
疇日三山意于茲萬緒睽金陵有仙館即
事尋丹梯

早入清遠峽

傳聞峽山好旭日棹前泝雨色搖丹嶂泉
聲聒翠微兩岩天作帶萬壑樹披衣秋橘
迎霜序春藤礙日輝翳潭花似織綠嶺竹
成圍寂歷環沙浦葱蘢轉石圻露餘江未
熱風落瘴初稀猿飲排虛上禽驚掠水飛
榜童夷唱合樵女越吟歸良候斯爲羨邊
愁自有違誰言望鄉國流涕失芳菲

謁禹廟

夏王乘四載茲地發金符峻命終不易報

功疇敢踰先驅總昌會後至伏靈誅玉帛
空天下衣冠照海隅旋聞厭黃屋便道出
蒼梧林表祠轉茂山阿井詎枯舟遷龍負
壑田變鳥耘蕪舊物森如在天威肅未殊
玄夷屈瑤席玉女侍清都奕奕閨闈邃軒
軒伏衛趨氣清連曙海雲白洗春湖猿嘯
有時苔禽言常自呼靈歆異茲精至樂匪
笙竽茅殿今不襲梅梁古製無運逢日崇
麗業盛苔昭蘇伊昔力云盡而今功尚敷
揆材非箭美精享愧生芻郡職昧爲理拜
空寧自誣下車霰已積攝事露行濡人隱
冀多祐曷難霑薄軀

七言律詩

奉和春初幸太平公主南莊應制
青門路接鳳凰臺素澹宸遊龍騎來澗草
自迎香輦合巖花應待御筵開文移北斗
成天象酒遞南山作壽杯此日侍臣將石
去共歡明主賜金迴

三陽宮石淙侍燕應制

得幽字

離宮祕苑勝瀛洲別有仙人洞壑幽崑崙邊

樹色含風冷石上泉聲帶雨秋鳥向歌筵
來度曲雲依帳殿結爲樓微臣昔忝方明
御今日還陪八駿遊

餞中書侍郎來濟

曖曖去塵昏灞岸飛飛輕蓋指河梁雲峯
衣結千重葉雪岫花開幾樹粧深悲黃鶴
孤舟遠獨歎青山別路長却將分手沾襟
淚還用持添離席觴

五言絕句

渡漢江

嶺外音書斷經冬復歷春近鄉情更怯不
敢問來人

河陽

昔日河陽縣氛氲香氣多曹娘嬌態盡春
樹不堪過

嵩山夜還

家住嵩山下好采舊山薇自省遊泉石何
曾不夜歸

湖中別鑒上人

願與道林近在意逍遙篇自有靈佳寺何

用沃洲禪

題鑒上人房二首

落花雙樹積芳艸一庭春玩之堪興異何
必見幽人

又

晚入應真理經行尚未回房中無俗物林
下有青苔

荅田徵君

出遊杳何處遲回伊洛間歸寢忽成夢死
在嵩丘山

傷曹娘

鳳飛樓伎絕鸞死鏡臺空獨憐脂粉氣猶
著舞中衣

燕巢軍幕

非關憐翠幕不是厭朱樓故來呈燕頤報
道欲封侯

七言絕句

苑中遇雪應制

紫禁仙輿詰旦來青旂遙倚望春臺不知
庭霰今朝落疑是林花昨夜開

送司馬道遊天台

羽客笙歌此地違
離筵數處白雲飛
蓬萊闕下長相憶
桐栢山頭去不歸

登逍遙樓

逍遙樓上望鄉關
綠水泓澄雲霧間
北去衡陽二千里
無因鴈足繫書還

奉和春日翫雪應制

北闕彤雲掩曙霞
東風吹雪舞山家
瓊童定少千人和
銀樹長芳六出花

下嵩山歌

下嵩丘兮多所思
携佳人兮步遲遲
松間明月長如此
君再遊時復何時

傷曹娘二首

可憐冥寞去何之
獨立丰茸無見期
君看水上芙蓉色
恰似生前歌舞時
前溪妙舞今應盡
子夜新歌遂不傳
無復綺羅嬌白日
直將珠玉閉黃泉



